

Inuussutissat pillugit Inatsisartut inatsisaat

Kapitali 1

Atuuffia, siunertaq, nassuiaatit aamma oqartussaasut pillugit aalajangersakkat

Inatsisartut inatsisaata atuuffii

§ 1. Inatsisartut inatsisaat manna Kalaallit Nunaata nunataani inuussutissanik tunisassiornermut, suliarinninnermut tunisinermullu atuuppoq, taamaattoq tak. imm. 3 aamma 4.

Imm. 2. Inatsimmiipput inuussutissanik passussinermi immikkoortut tamarmik, tassunga ilanngullugit tunisassiorneq, suliarinninneq, uninngatillugit toqqortarinninneq, poortuineq, assartuineq, naggataatigullu atuisussamut tuniniaaneq pilersuinerlu.

Imm. 3. Inatsit inoqutigiinni nammineq atugassanik inuussutissanik suliarinninnermut atuutinngilaq, taamaattorli tak. § 8 imm. 3.

Imm. 4. Inuussutissanik eqqussuineq annissuinerlu inatsimmut ilaanngillat, tassunga ilanngullugit aalisakkanik aamma aalisakkanit tunisassianik niueqatigiinneq.

Inatsisartut inatsisaata siunertaa

§ 2. Inatsisartut inatsisaata matuma siunertaraa inuussutissanut naleqqiullugu inuit peqqissussaasa qaffasissumik illersorneqarnissaasa atuisullu soqutigisaasani illersorneqarnissaasa qulakkeerneqarnissaat, taamaalilluni inuussutissatigut qinigassat assigiinngisitaartuuneri, tassunga ilanngullugit ileqqutoqqat malillugit tunisassiorneq pingaartumik eqqarsaatigineqarlutik.

Nassuiaatit

§ 3. Uani Inatsisartut inatsisaanni tuliiuttut ima paasineqassapput:

- 1) "Inuussutissat" atortussiat tunisassialluunniit, suliarineqarsimannginnerat imaluunniit tamakkiisumik ilaannakortumilluunniit suliarineqarsimanerat apeqqutaatinnagu, inunnit nerisassatut imaluunniit nerineqartussatut naatsorsuutigineqarlutik aalajangiunneqarsimasut. Inuussutissat pillugit nassuiaammut ilaapput imeq tunisassianik atortussianilluunniit nerisassatut aalajangiussanik suliaqarnermut, suliarineranut asiunaveersaarneqarneranullu inuussutissaleriffinnit atorneqartoq.
- 2) "Inuussutissat pillugit inatsit" nalinginnaasumik inuussutissanut pingaartumillu inuussutissat isumannaatsuunissaannut atorneqartut inatsisit, peqqussutit allaffissornikkullu aalajangersakkat. Inuussutissanik tunisassiornermut, suliarinninnermut nassiusuinernullu atasut tamarmik Inuussutissat pillugit inatsimmiipput.
- 3) "Inuussutissaleriffik" pisortanit namminersortunilluunniit ingerlanneqartoq sunaluunniit,

inuussutissanik sutigulluunniit tunisassiornermut, suliarinninnermut, nassiussuinnermut aamma tunisinermut atasumik iluanaaruteqarluni iluanaaruteqarnaniluunniit sumilluunniit suliaqartoq.

4) "Inuussutissaleriffimmi pisortaq" inuk imaluunniit inatsisitigut pisinnaatitaasoq pisussaataasorlu pineqartup pisortaaffigisaani inuussutissaleriffimmi inuussutissat pillugit inatsimmi aalajangersakkat eqqortinneqarnissaannut akisussaasoq imaluunniit inuit imaluunniit inatsisitigut pisinnaatitaasut pisussaataasullu inuussutissaleriffimmi pineqartut pisortaaffigisaanni inuussutissat pillugit inatsimmi aalajangersakkat eqqortinneqarnissaannut akisussaasut.

5) "Niuertarfik" inuussutissanik passussineq suliarinninnerluunniit taakkuninngalu tunisisarfiani toqqortarineri imaluunniit inaarutaasumik atuisussamut pilersuineq, tassunga ilanngullugit, taakkununngali killilernerqanngitsumik nassiussuiffiit, kalaalimineerniarfik, nerisassanik pilersuiffiit, suliffeqarfiit kantiinai, pisortat suliffiutaasa igaffii, neriniartarfiit allallu taamaaqataanik nerisassatigut kiffartuussisut kiisalu niuertarfiit.

6) "Tunisineq" tunisinissaq siunertaralugu inuussutissanik pigisaqarneq, tassunga ilanngullugit tunisinissamik neqerooruteqarneq akissarsiaqarnikkulluunniit allatigut nuussinerit, tassunga ilanngullugit tunisinertaa nassiussuinnerlu allatigullu ingerlanneqartoq nuussinertaa.

7) "Suminngaanneernerannik paasisaqarsinnaaneq" inuussutissap, uumasup inuussutissanik tunisassiornermi atorineqartup imaluunniit atortussiat inuussutissamut akussatut aalajangiussap imaluunniit naatsorsuutigineqarsinnaasup imaluunniit nerukkaatip tunisassiornermut suliarinninnermut nassiussuinnermut atasut tamarmik suminngaanneernerisa paasineqarnissaanut malinnaaffigisinnaanerillu periarfissaqarneq.

8) "Inaarutaasumik atuisoq", inuussutissamik inaarutaasumik atuisoq suliffeqarfimmut inuussutissaleriffimmut atatillugu sulianut atatillugu imaluunniit suliat ingerlaqqinnerini nioqqutissamik atuisuunngitsaq.

9) "Ajutoorsinnaaneq" ingerlanerup peqqissusermut ajortumik sunniuteqarsinnaanerata ilimanaateqarnera, tamatuma qanoq annertutigisumik sunniuteqarsinnaanermik nalilersuinnermut sanilliullugu.

10) "Ajutoortoqarsinnaaneramik misissueqqissaarneq" ingerlatsineq imminnut atasumik pingasunik immikkoortoqartoq: ajutoortoqarsinnaaneramik nalilersuineq, ajutoorfusinnaasunik aqutsineq ajutoornerillu pillugit attaveqaqatigiinneq.

11) "Ajutoortoqarsinnaaneramik nalilersuineq" ilisimatuussutsikkut tunngaveqartumik ingerlataqarneq sisamanik immikkoortulik: navianartup paasineqarnera, navianartup pissusiata nalilerner, sunniutaanik nalilersuineq ajutoorfusinnaasullu pissusianik naliliineq.

12) "Ajutoorfusinnaasunik aqutsineq" ingerlatsineq tassaasoq suliniutip assigiinngitsunik periarfissaqarneramik missiliuineq, ajutoortoqarsinnaaneramik nalilersuinnermik pissutsinillu attuumassuteqartunik allanik naliliineq pisariaqassappallu tulluurtumik pitsaaliuinissamut nakkutilliinissamullu periarfissanik toqqaaneq.

13) "Ajutoornerillu pillugit attaveqaqatigiinneq" ajutoortoqarsinnaaneramik nalilersuinnerup inernerit pillugit attaveqaqatigiinneq nassuiaanerlu aamma ajutoorfusinnaasunik aqutsinnermut atatillugu aalajangiinnerut tunngaviusut.

14) "Navianartaq" inuussutissani uumassuseqartunut, akuutissatigut sunniuteqartitsisunulluunniit atasinnaasunik imaluunniit inuussutissap qanoq ittuunerannut atasut peqqinnissamut ajoqusiillutik sunniuteqarsinnaasut.

- 15) "Tunisassiornermut, suliarinninnermut nassiussuinnermut tunisinermullu atasut" inuussutissap aallaqqaammut tunisassiarineraniit toqqortarineranut, assartorneranut, tunineqarneranut imaluunniit inaarutaasumik atuisumut tunniunneranut atasut tamarmik.
- 16) "Pingaarnertut tunisassiat" pingaarnertut tunisassiat tassaapput pingaarnertut tunisassiornermiit tunisassiat, tassunga ilanngullugit nunalerinnermi nersutaatiniillu tunisassiat, kiisalu aallaaniarnermiit aalisarnermiillu tunisassiat.
- 17) "Pingaarnertut tunisassiorneq" pingaarnertut tunisassianik tunisassiorneq, kinguaassioertitsineq naatitsinerluunniit, tassunga ilanngullugit inerittunik katersuineq, immuiaaneq toqutsinerlu sioqqullugu nersutaatinik tunisassiorneq. Taaguummot aamma ilaapput aallaaniarneq aalisarnerlu inerittunillu katersuineq aamma pinngortitamiittunik toqqaannartumik katersuineq.
- 18) "Pingaarnertut tunisassioortoq" inuk suliffeqarfilluunniit pingaarnertut tunisassioortuusoq.
- 19) "Namineq nakkutilliineq" tassaavoq aaqqissuussineq tunisassiat peqqinnissamut ajoqusiinnginnissai taamaalillutillu inuussutissat pillugit inatsimmik atuuttumik eqquutitsineranik qulakkeerinninnissamut tunisassianik suliffeqarfiup tunisaanik suliffeqarfiullu suliarisaanik inuussutissaleriffiit ingerlaavartumik nakkutilliinerat.
- 20) "Annikitsumik tunisassiorneq" tassaavoq pilersitsisuaqqat annikitsumik annertussuseqartumik tunisassianik pisiortortut, suliarinnittut tunisaqartullu.
- 21) "Nittarsaaneq" tunisinissaq siunertaralugu tunisassianik eqqartuineq nassiussuinerlu.
- 22) "Oqartussat aalajangiisussaataasut" Kalallit Nunaanni Uumasunut Nakorsaqaarfik Inuussutissalerinnermullu Oqartussaaffik imaluunniit Naalakkersuisunit toqqarneqartoq nakkutilliinnermi oqartussat.
- 23) "Akuersissut" tassaavoq oqartussat aalajangiisussaataasut suliffeqarfiup aaqqissuunnera, ingerlanneqarnera namminerlu nakkutiginnera pillugit Inatsisartut inatsisaannut uunga naapertuunnissaa pillugu akuersissuteqarnerat.
- 24) "Utertitsineq" tassaavoq nioqqutit niuertarfinnit peerneqarneri inaarutaasumik atuisumut anngutinnginneranni.
- 25) "Utertitseqqusineq" tassaavoq nioqqutissat inaarutaasumik atuisunut tunniunneqareersut atorineqartussalluunniit uterteqquneqarneri sulluunniit.
- 26) "Nioqqutissat inuussutissanik isumannaallisaanermik piumasaqaatinik eqquutsitsinngitsut" tassaapput nioqqutissiat Inatsisartut inatsisaannik tassanngalu malittarisassanik piumasaqaatinillu aalajangersakkanik eqquutsitsinngitsut.
- 27) "Niuertarfinnut pilersuisoq" suliffeqarfiuvoq suliffeqarfimmut allamut inuussutissanik suliareqqiisartoq, toqqorsisartoq, assartuisartoq tuniniaaqqittartorluunniit.
- 28) "Atortut inuussutissanut attuutussat" tassaapput inuussutissalerinnermut atatillugit suliaqarnernut atortut inuussutissanut attuutussatut naatsorsuutigineqartut.

Oqartussaasut pillugit aalajangersakkat

§ 4. Inatsisartut inatsisaanni matumani aalajangersakkat malinneqarnerat Naalakkersuisut nakkutigissavaat.

Imm. 2. Aalajangiinnermut piginnaatitaanermik inatsimmi akisussaaffiit pillugit kommunalbestyrelsineq

sinniisuusinnaatitaanermut tamakkiisumut ilaannakuusumulluunniit malittarisassanik Naalakkersuisut aalajangersaasinnaapput.

§ 5. Kalaallit Nunaanni Uumasunut Nakorsaqaarfik Inuussutissalerinermullu Oqartussaasut inatsisartut inatsisaanni matumani aalajangersakkat eqqortinneqarnerinik nakkutilliinermi oqartussat nakkutilliillutillu misissuinerinik ingerlataqarput, tak. kapitali 13.

Imm. 2. Kalaallit Nunaanni Uumasunut Nakorsaqaarfik Inuussutissalerinermullu Oqartussaasunit allaanerusunik nakkutilliinermi oqartussatut Naalakkersuisut toqqaasinnaapput.

Kapitali 2

Inuussutissanik tunisassiornermut, toqqorsinermut, nassiussuinermut tunisinermullu tunngaviit

§ 6. Inuussutissat atortussiallu inuussutissanut atassuteqartut suliarineqarnerminni, tunisassiarineqarnerminni, toqqortarineqarnerminni ussassaarutigineqarnerminnilu pitsaasuussapput aamma piffissami tunineqarnerminni naammaginartumik ajortunngujaassuseqassallutik tunineqarnerminnilu nalaanni ullussaminnik qaangiisimassanatik.

Imm. 2. Inuussutissat nalinginnaasumik atorineqarnermikkut nappaatinik tunillaassinnaasutut imaluunniit napparsimalersitsisinnaasutut, toqunartoqalersitsisinnaasutut naatsorsuutigineqarpata, imaluunniit inuussutissat peqqiilliortitsinerat, asiusimaneri, mingutsinneqarsimaneri, kukkusumik nerisassiarineqarsimaneri allatigulluunniit inuit nerisassaattut naleqqutinngitsutut isigineqarsinnaappata imaluunniit inuussutissat isumannaatsuunissaat pillugu piumasaqaatinik naammassinninngippata tunineqaqqusaanngillat imaluunniit inuit nerisassaattut tunniunneqaqqusaanatik.

Imm. 3. Inuussutissanik nioqqutissiat imm. 1 naapertorlugu ullussaminnik qaangiisimasut tuniniarneqartarneri allatulluunniit tunniunneqartarneri pillugit Naalakkersuisut malittarisassiorsinnaapput.

§ 7. Inuussutissanik atortussiallu inuussutissanut atassuteqartut suliarinninneq, tunisassiorneq, toqqortaqarneq, nassiussuineq tuniniaanerlu eqqiluisaarnikkut illersorneqarsinnaasumik ingerlanneqassaaq taamaalilluni inuussutissat atortussiallu inuussutissanut atassuteqartut inuit nerisassaattut naleqqukkunnaarlutik mingutsinneqarnatik allatigulluunniit ajoqusiinnaasumik sunnerneqarnatik.

Imm. 2. Inunnut inuussutissanik atortussiallu inuussutissanut atassuteqartut suliarinninnermik, toqqorsinnermik, tunisassiornermik, nittarsaanermik nakkutilliinermillu suliaqartunut inuup eqqiluisaarnissaa peqqissutsikkullu misissorneqartarnissaa pillugu malittarisassanik Naalakkersuisut aalajangersaasinnaapput.

Imm. 3. Inuussutissanik atortussiallu inuussutissanut atassuteqartut suliarinninneq, tunisassiorneq, toqqortaqarneq, tunisineq nakkutilliinerlu inunnit napparsimasunit imaluunniit inuussutissanut tunillaassinnaasumik inuussutissanik atortussiallu inuussutissanut atassuteqartut inuit nerisassaattut naleqqukkunnaarsitsisinnaasumik nappaateqartutut naatsorsuutigineqartumit suliaqaqqusaanngillat.

Imm. 4. Inuussutissanik suliarinninnermi, toqqorsinnermi, tunisassiornermi nittarsaanermilu eqqiluisaarneq pillugu malittarisassanik Naalakkersuisut aalajangersaasinnaapput.

§ 8. Nunap ilaani aalajangersimasumi inuussutissat atortussialllu inuussutissanut atassuteqartut mingutsinneqarsinnaanerannik aarlerinartoqarpat, tassunga ilanngullugu radiup qinngorneranik imaluunniit avatangiisimi mingutsinneqarsinappata, allatigulluunniit inuit nerisassaattut atorneqarnissaat naleqqukkunnaarpata, nioqqutissiat taamatut ittut tuniniarneqarneri Naalakkersuisunit inerteqqutigineqarsinnaapput, killeqartinneqarlutik imaluunniit piumasaqaatinik aalajangersaavigineqarlutik.

Imm. 2. Inuussutissat atortussallu inuussutissanut attuuttussat mingutsinneqarsimasut piumasaqaatit suut tunngavigalugit tuniniarneqarsinnaaneri pillugit Naalakkersuisut malittarisassanik aalajangersaasinnaapput.

Imm. 3. Nunap immikkoortuini aalajangersimasuni naatitanik naatitsineq, nersutaatinik kinguaassiortitsineq, piniarneq, aalisarneq imaluunniit inerittunik, paarmanik, pupinnik, manninnik, honningimik katersineq nioqqutissiornerluunniit Naalakkersuisunit inerteqqutigineqarsinnaapput, killilerneqarsinnaapput imaluunniit piumasaqaatinik aalajangersaaffigineqarsinnaapput.

§ 9. Inuussutissanik atortussallu inuussutissanut attuuttussanik suliarinninnermi atortussat aamma atortut imaluunniit suliarinneriaatsit aalajangersimasut atorneqarnissaat pillugit maleruagassanik Naalakkersuisut aalajangersaasinnaapput, tassunga ilanngullugit sananeqaatitigut atortorissaarutit, qinngornerit atorlugit asiunaveersaatinik allanillu asiunaveersaatinik imaluunniit suliarinneriaatsinik atuinerit.

Imm. 2. Inuussutissat imaluunniit akorineqartut atortussallu inuussutissanut attuuttussat manna tikillugu inuussutissatut atortussalluunniit inuussutissanut attuuttussatut isigineqarsimanngitsut, imaluunniit siusinnerusukkut siunertamut atorneqarsimanngitsut atortorissaarutit atornerisigut pilersinneqartut, atorneqarnissaat imaluunniit tuniniarneqarnissaat sioqqullugu akuerineqartarnissaannut malittarisassanik Naalakkersuisut aalajangersaasinnaapput.

Kapitali 3

Ajutooratarsinnaanermik misissueqqissaarneq

§ 10. Inuit peqqissuunerisa inuunerisalu qaffasissumik illersorneqarnissaat pillugu nalinginnaasumik anguniagaq naammasiniarlugu inatsisartut inatsisaat manna malillugu inuussutissanik nakkutiginninneq ajutoortoqarsinnaanerannik misissueqqissaarnernik tunngaveqassaaq, aaqqiissutissap qanoq ittuunerani allatigulluunniit pisut eqqarsaatigalugit tamanna naleqqutinngitsuunngippat.

Imm. 2. Ajutoortoqarsinnaanerannik misissueqqissaarnerup suliarinissaanut malittarisassanik suleriaatsinillu Naalakkersuisut aalajangersaassapput.

Kapitali 4

Inuussutissat katitigaanerit

§ 11. Inuit peqqissuunerisa illersorneqarnissaat siunertaralugu inuussutissat nunatsinni tunisassat katitigaaneri qanorlu pitsaassuseqarnissaat, tassunga ilanngullugit inuussutissatigut immikkut siunertanut inuussutissanullu akussanut aalajangerneqarsimasut inuussutissat pillugit malittarisassanik Naalakkersuisut aalajangersaasinnaapput.

§ 12. Piumasaqaatit suut tunngavigalugit nunatsinni tunisassanut akuutissat mamarsaasiallu atorneqarsinnaaneri, tassunga ilanngullugu siunertanut sunut, qanoq annertutigisut tunisassianullu sunut, aamma akuutissat suuneri akuitsuunerilu pillugit malittarisassanik Naalakkersuisut aalajangersaasinnaapput.

Kapitali 5

Inuussutissanik nittarsaassisarneq nalunaaqutsersuisarnerlu

§ 13. Paasissutissanik atuisunut, suliffeqarfinnut imaluunniit nakkutilliinermi oqartussanut pingaaruteqartunik inuussutissat atortussallu inuussutissanut attuuttussat nalunaaqutsersornissaat pillugu malittarisassanik Naalakkersuisut aalajangersaasinnaapput.

Imm. 2. Inuussutissanik atortussallu inuussutissanut attuuttussanik nalunaaqutsersuisarneq nittarsaassisarnerlu pillugit Naalakkersuisut malittarisassanik aalajangersaasinnaapput, tassunga ilanngullugit:

- 1) Inuussutissat immikkut peqqissinartuunerisa imaluunniit pitsaaliuinermit sunniuteqarnerisa allanneqarnissaat.
- 2) Inuussutissap aalajangersimasumik pissuseqarnera pillugu pitsassuuneranik erseqqissaanerup atorneqarnera.

§ 14. Nunatsinni tuniniagassanik akuutissanik aamma mamarsaasianik nalunaaqutsersuineq, tassunga ilanngullugit atornissaanut ilitersuutit mianersoqqussummillu nalunaaqutsersuineq pillugit maleruagassanik Naalakkersuisut aalajangersaasinnaapput.

Kapitali 6

Atortussiat atortullu inuussutissanut attuuttussatut naatsorsuussat

§ 15. Makku pillugit malittarisassanik Naalakkersuisut aalajangersaasinnaapput:

- 1) Atortussanik inuussutissanut attuuttussanik atuineq.
- 2) Atortussanik inuussutissanut attuuttussanut ilaasunik akuutissanik atuineq.
- 3) Atortussanik inuussutissanut attuuttussanik tunisassiornermi atorneqartussanik suliarinneriaatsinik atuineq.
- 4) Atortussanik inuussutissanut attuuttussanik katiterisarneq nalunaaqutsersuisarnerlu.
- 5) Atortussanik inuussutissanut attuuttussanik tuniluunnerit.
- 6) Inuussutissanut aalajangersimasunut pissutsinulluunniit aalajangersimasunut atorneqartussat atortussat inuussutissanut attuuttussat piusinnaanerinit kimittussusissaanullu piumasaqaatit.
- 7) Atortussanik inuussutissanut attuuttussat atorfissaannut naleqquttuunerinik uppersaammik ilaqartinneqassasut.

Imm. 2. Aammattaaq Naalakkersuisut makku pillugit malittarisassanik aalajangersaasinnaapput:

- 1) suliffeqarfinni aqutsisut, nioqqutissiortut imaluunniit atortussanik inuussutissanut attuuttussanik nioqqutissanut aalajangersimasumik atugassanik eqqussuisartut atortussat atortulluunniit tamakku qanoq iliorluni niuerfimmiit peerneqartarnissaat siunertaralugu aalajangiisarnissaat.

2) atortussat inuussutissanut attuuttussat inuussutissat isumannaatsuunissaannut ulorianarpata imaluunniit ulorianartutut isumaqarfigineqarpata nittarsaanneqassanngitsut.

§ 16. Atortussat inuussutissanut attuuttussat, inuussutissanut attuuttussatut aalajangiussat, inuussutissat isumannaatsuunissaannut piumasaqaatinik eqqortitsinngitsut ingerlataqartut pineqartut isumaqarpata imaluunniit isumaqassallutik tunngavissaqarpata § 15, imm. 2, nr. 1 malillugu malittarisassat atulersinneqartut malillugit utertitsineq pissaaq.

Kapitali 7

Suminngaanneernerannik paasisaqarsinnaaneq

§ 17. Inuussutissaleriffimmik pisortat inuussutissat aamma atortussanit inuussutissanut attuuttut imaluunniit uumasut inuussutissanik tunisassiornermi atorineqartut aalajangersimasut aamma akuutissat suulluunniit inuussutissamut akussatut aalajangiunneqarsimasup imaluunniit akussatut naatsorsuutigineqartup suminngaanniit pissarsiarisimanerlugit paasisinnaassavaat. Inuussutissaleriffimmi pisortaq aamma tunisassiap sumut tunniunneqarnissaa pillugu paasisaqarsinnaassaaq ilisimatitsisinnaassallunilu. Paasissutissat tamakkua taakku noqqaanerisigut oqartussanut piginnaatitaasunut piareersimassapput.

Imm. 2. Suliffeqarfinnut allanut sumut tunisassiamik pilersuisimanerup paasineqarnissaanut inuussutissaleriffinni pisortanut aaqqissuussinernik suleriaatsinillu pilersitsinissamut piumasaqaatit pillugit malittarisassanik Naalakkersuisut aalajangersaasinnaapput.

§ 18. Inuussutissaq atortussarluunniit inuussutissanut attuuttoq tunineqartoq imaluunniit tunineqartussatut naatsorsuutigineqartoq uppersarsaat paasissutissalluunniit tulluurtut iluaqutigalugit suminngaanneernerannik paasisaqarnissamik ajornannginnerulersitsisumik tulluurtumik nalunaaqutserneqarsimassaaq suuneranilluunniit paasissutissiissutigineqarluni.

Imm. 2. Nalunaaqutsiinnermut paasisaqarnissamullu piumasaqaatinik Naalakkersuisut aalajangersinnaapput, tak. imm. 1.

Kapitali 8

Inuussutissanut akisussaaneq

§ 19. Inuussutissaleriffinni pisortat suliffeqarfimmi pisortaaffigisaminni tunisassiornermi, suliarinninnermi nassiussuinnermilu atasuni tamani ingerlataminnut attuumassuteqartunik inuussutissat atortussalluunniit inuussutissanut attuuttut pillugit inatsimmi piumasaqaatit naammassineqartut qulakkiissavaat, piumasaqaatillu pineqartut eqqortinneqarneri nakkutigalugit. Suliffeqarfik suliffeqarfiup nakkutilliinnermik suliaanut tamanut akisussaasuvoq.

§ 20. Inuussutissaq atortussalluunniit inuussutissanut attuuttoq suliffeqarfiup eqqussimasai, tunisassiarisimasaa, suliarisimasai, suliareqqissimasai nassiussimasaaluunniit inuussutissat isumannaatsuunissaannik piumasaqaatinik naammassinngitsoq suliffeqarfimmi inuussutissaleriffimmi pisortaq ilisimasaqarpata imaluunniit naatsorsuutiginnissaanut tunngavissaqarpata inuussutissap

atortussalluunniit inuussutissanut attuuttup pineqartup niuerfimmiit utertinneqarnissaa siunertaralugu ingerlaannartumik qanoq iliornissamut taanna aalajangiissaaq, tamannalu pillugu oqartussat aalajangiisussaataasut ilisimatillugit.

Imm. 2. Nioqqutissiaq imm. 1 naapertorlugu atuisunut anngussimappat inuussutissalerinermik suliffeqarfiup pisortaata atuisut paasinartumik pitsaasumillu paasitissavai nioqqutissap sooq utertinneqarnerata tunngavianik, pisariaqarpallu nioqqut pineqartoq atuisunit utertissallugu peqqinnerup illersorneqarnissaata qaffasissumik inissisimanissaa pillugu iliuusissat allat naammanngippata.

§ 21. Suliffeqarfimmi inuussutissaleriffusumi pisortaq niuertarfinnut imaluunniit nassiussuinnermut akisussaasoq, aamma inuussutissap poortorneqarneranut, nalunaaqutsersorneranut, isumannaatsuuneranut imaluunniit innarligassaannginneranut sunniuteqanngitsoq, tunisassiat inuussutissat isumannaatsuunissaannut piumasaqaatinik naammassinninngippata niuerfimmiit, inaarutaasumilluunniit atuisumiit utertinneqarnissaat, tuniniarnerisa unitsinnissaat utertinnissaalluunniit siunertaralugu ingerlatanut sinaakkusiussat iluanni pisariaqartumik qanoq iliornissamut piareersaateqassaaq.

Imm. 2. Suliffeqarfimmi inuussutissaleriffusumi pisortaq inuussutissap suminngaanneernerannik paasisaqarnissamut noqqaasoqarneratigut nakkutilliinermi oqartussanut paasissutissanik tulluurtunik ingerlatitseqqinnikkut inuussutissap isumannaatsuuneranut ikiutissaaq.

Kapitali 9

Eqqiaanermi tunillannartuiaanermi tarngutinillu atortut

§ 22. Akuersisarneq pillugu katiterineq nalunaaqutsersuinerlu kiisalu eqqiaanermi, tunillannartuiaanermi tarngutinillu atortunik akuersineq, katiterineq nalunaaqutsersuineq kiisalu atuineq pillugu malittarisassanik Naalakkersuisut aalajangersaasinnaapput.

Imm. 2. Aammattaaq Naalakkersuisut makku pillugit malittarisassanik aalajangersaasinnaapput:

- 1) suliffeqarfimmi pisortat, eqqiaatinik, tunillannartuiaatinik imaluunniit tarngutissanik tunisassiorlut eqqussuisartulluunniit eqqiaatit, tunillannartuiaatit imaluunniit tarngutissat nioqqutigineqartut niuertarfinnit utertinneqarnissaat siunertaralugu upalungaarsimanissaminut malittarisassaqaasasut.
- 2) eqqiaatit, tunillannartuiaatit tarngutissat tuniniarneqaqqusaanngitsut inuussutissat isumannaatsuunissaannut ulorianarpata imaluunniit ulorianartutut naatsorsuutigineqarpata.

§ 23. Eqqiaatit, tunillannartuiaatit tarngutilluunniit inuussutissat isumannaatsuunissaannut piumasaqaatinik eqqortitsinngitsut ingerlataqartut pineqartut isumaqarpata imaluunniit isumaqassallutik tunngavissaqarpata § 22, imm. 2, nr. 1 malillugu malittarisassat atulersinneqartut malillugit utertitsineq pissaaq.

Kapitali 10

Suliffeqarfinnik inuussutissaleriffusunik nalunaarsuineq, akuersineq namminerlu nakkutilliineq

§ 24. Suliffeqarfiit inuilluunniit inuussutissarsiornissaaq siunertaralugu inuussutissanik imaluunniit atortussanik inuussutissanut attuuttunik suliarnittut, toqqorsisut, assartuisut, niueruteqartut

imaluunniit eqquussut oqartussat aalajangiisussaataasunit nalunaarsorneqaqqaaratik ingerlatartik aallartissinnaanngilaat.

§ 25. Suliffeqarfiit inuussutissaleriffusut aalajangersimasut imaluunniit suliffeqarfiit inuussutissaleriffusut immikkut ittut aalajangiisinnaasutut oqartussanit akuerineqaqqaarnatik ingerlataminnik aallartitsinnaanngitsut pillugit malittarisassanik Naalakkersuisut aalajangersaasinnaapput.

Imm. 2. Naalakkersuisut suliffeqarfiit inuussutissaleriffusut akuerineqarnissaat pillugu malittarisassanik aalajangersaassapput, tamatumunga ilanngullugit suliffeqarfiup inuussutissalerisup akuersisummik nalunaarfigineqarnissaa pillugu piumasaqaatit, aamma akuersisummut atugassarititaasunik ilanngussinissamut periarfissaq pillugu.

Imm. 3. Qaqugukkut akuersisummik nutaamik piniartoqartarnissaa pillugu maleruagassanik Naalakkersuisut aalajangersaasinnaapput.

Imm. 4. Suliffeqarfiit inuussutissaleriffusut aalajangersimasut imaluunniit suliffeqarfiit inuussutissaleriffusut immikkut ittut akuersineq pillugu piumasaqaatinut ilaatinnginnissaat pillugu maleruagassanik Naalakkersuisut aalajangersaasinnaapput.

Imm. 5. Suliffeqarfik piumasaqaatinik naammassinninngippat, imaluunniit akuersisimanermut tunngaviusut annertuumik allanngorsimappata akuersisimanerup arsaarinnissutigisinnaanera pillugu maleruagassanik Naalakkersuisut aalajangersaasinnaapput. Aalajangiussami allamik allassimasoqanngippat arsaarinninneq piffissami suliffeqarfimmut nalunaaruteqarnermiit atuutilissaaq. Suliffeqarfik inuussutissaleriffusoq, akuersisumminik arsaarneqarsimasoq kingumut akuerineqarnissamik kissaateqarpat suliffeqarfimmi inuussutissaleriffusumik ingerlatsinissamut akuersisummik nutaamik qinnuteqartoqassaaq.

§ 26. Piginnittunik nikittoqarneranik qanoq ilinerani nalunaartoqarnissaa pillugu malittarisassanik Naalakkersuisut aalajangersaasinnaapput kiisalu paasissutissat suut nalunaarutigineqassanersutpillugit.

§ 27. Inuussutissat eqqiluisaarnikkut, peqqinnissakkut imaluunniit pitsaassutsikkut pitsaasuunissaasa qulakkeerneqarnissaat siunertaralugu inuussutissanik pingaarnertut tunisassiorneq pillugu malittarisassanik Naalakkersuisut aalajangersaasinnaapput.

§ 28. Tunisinissaq nioqqutissiornissarlugu siunertaralugu ileqquusumik sularineqartunik inuussutissanik tunisassiorneq aamma annikitsumik tunisassiorneq pillugu immikkut ittunik malittarisassanik Naalakkersuisut aalajangersaasinnaapput.

Imm. 2. Annikitsumik tunisassiornerup annertussusaa pillugu piumasaqaatinik erseqqinnerusunik Naalakkersuisut aalajangersaassapput.

§ 29. Suliffeqarfiit inuussutissaleriffusut, toqqorsiviusut, assartuutit assigisaalu inuussutissat pillugit inatsimmut ilaasut eqqiluisaartinnissaat kiisalu aaqquissuunneqarneri ingerlanneqarnerilu pillugit malittarisassanik Naalakkersuisut aalajangersaasinnaapput. Matumani ilanngullugit assartuutininik, ininik, pequtininik, atortuninik, maskiinainik, poortuutininik assigisaanillu kiisalu siku, imeq, aalaq, silaannaq silaannaallu inuussutissanik passussinermi atorineqartartunik imaluunniit ininik, atortuninik il.il. eqqiaanermi

atortut akuerineqartarnissaat pillugit malittarisassaliortoqarsinnaavoq imaluunniit aalajangersagaliortoqarluni.

§ 30. Suliffeqarfiit inatsimmut ilaatinneqartut tunnisassiat Kalaallit Nunaanni Europamilu niuffaffinnut nioqqutissianngorlugit akuerisaasunut suliffeqarfinnullu ilaatinneqartunuinnaq atorneqartussaasutut Naalakkersuisut malittarisassiorsinnaapput.

§ 31. Suliffeqarfiit inatsimmut ilaasut, nammineq akilikkaminnik, eqqiaanermi pissutsinik aamma inuussutissanik tunisassiornermut atasunik tamanut attuumassuteqartunik ingerlatanik nammineq nakkutilliinermik ingerlatsisarnissaat pillugu malittarisassanik Naalakkersuisut aalajangersaasinnaapput. Tassunga ilanngullugu nammineq nakkutilliinerup qanoq piareersarnissaa, ingerlanneqarnissaa uppersarnissaa pillugit malittarisassanik aalajangersaasoqarsinnaavoq.

Imm. 2. Suliffeqarfiit inatsimmut ilaasut nammineq akilikkaminnik erseqqinnerusumik aalajangersarneqarsimasunik paasiniaanermik misissuinerinillu ingerlatsisarnissaat pillugu Naalakkersuisut malittarisassanik aalajangersaasinnaapput.

Imm. 3. Suliffeqarfiit inatsimmut ilaasut nammineq akilikkaminnik misissueqqissaarnerup inernerinik oqartussat aalajangiisussaataasunut nassiussinissaat pillugu malittarisassanik Naalakkersuisut aalajangersaasinnaapput.

§ 32. § 32, imm. 2 malillugu misissueqqissaarnissat piumasarineqartut laboratoriani aalajangiisussaasutut oqartussanit akuerisaasunit suliarineqartassapput. Misissueqqissaarnermi inernerit nakkutilliisussatut oqartussanut piumasarineqarneranni takutinneqartassapput piffissallu naammagintup iluani.

§ 33. Suliffeqarfinni inuussutissaleriffusuni inatsimmut ilaasuni sulisunut suliaqartunut inuussutissalerinermi eqqiluisaarnissamut pinngitsoorani ilinniartitaanissaq pillugu maleruagassanik Naalakkersuisut aalajangersaasinnaapput.

Kapitali 11

Ilitsersuutit

§ 34. Inuussutissat isumannaatsuunissaannik qulakkeerinninniarnermi inuussutissalerinermik suliaqartunut inatsisartut inatsisaannut ilaatinneqartunut ilitsersuutit taakkulu tamanut saqqummiunneri Naalakkersuisut suliarisinnaavaat.

Imm. 2. Inuussutissalerinermik suliaqartut inatsisartut inatsisaannut ilaatinneqartut aalajangiisussatut oqartussanut akuersissutinik piniarnerminni namminneq ilitsersuusiatic suliaralugillu nassiussinnaavaat.

Kapitali 12

Akiliutit

§ 35. Pingaarnertut tunisassiorlut suliffeqarfiillu inuussutissaleriffusut inatsimmut ilaasut, tassunga ilanngullugit suliffeqarfiit atortussat inuussutissanut attuuttussanik sanaartortut, inatsit malillugu ingerlanneqartunut aamma inatsit malillugu malittarisassaqaartinneqartunut nakkutilliinerni

misissuinerilu aningaasartuutunik akiliuteqarnissaat pillugu malittarisassanik Naalakkersuisut aalajangersaasinnaapput.

Imm. 2. Inuussutissalerinnermik suliaqartut ilaat, isumaginninnermi suliaqarnermut atatillugu imaluunniit inuussutissarsiutigalugu iluanaarutiginarneqanngitsunik tuniniaasut suliffeqarfinnullu allanut unammilleqatigiinnermik siunertaqanngitsunik suliaqartut imm. 1 naapertorlugu nakkutilliinnermi aningaasartuutit ilaannakortumik akiliisarnissaat tamakkiisumilluunniit akiliisannginnissaat pillugit Naalakkersuisut malittarisassiorsinnaapput.

§ 36. Akitsuutit akileqqunissaat akilerneqarnissaallu kiisalu inatsit naapertorlugu akiliutunik akileeqqusineq akiliinerlu, tassunga ilanngullugit immikkut ulapinnartut nakkutilliinerit immikkullu ittumik misissuinerit, kiisalu suliffeqarfiup inuussutissaleriffiusup nakkutigineranut atatillugu nakkutilliisut angallannerisa, illusimatinnerinut nerisaqartinnerinullu akiliinerit pillugit malittarisassanik Naalakkersuisut aalajangersaasinnaapput.

Kapitali 13

Nakkutilliineq

§ 37. Nakkutilliinerit nakkutilliinnermilu nalunaarusiornerit akulikissusissaat annertussusissallu pillugit malittarisassanik Naalakkersuisut aalajangersaasinnaapput.

§ 38. Inuussutissat atortussalluunniit inuussutissanut attuuttut aamma suliffeqarfiit inuussutissaleriffiusut aalajangersimasut immikkut nakkutigineqarnissaat pillugu Naalakkersuisut malittarisassanik aalajangersaasinnaapput.

Imm. 2. Uumasunik toqoraavinni, nunatsinnut tunisassiortunut neqinik nakkutilliisarnermut Naalakkersuisut malittarisassaliorsinnaapput.

§ 39. Aalajangiisussaatitaasutut oqartussat piumasaqaatit inatsimmi aalajangersarneqarsimasut malinneqarnissaannut pisariaqartutut isigineqartunik aalajangiisinnaapput, taakkununga ilanngullugu erseqqissaanernik, peqqussutunik inerteqqutinillu nalunaaruteqartassallutik.

Imm. 2. Aalajangiisussaatitaasutut oqartussat peqqussutit inerteqqutillu, tak. imm. 1, suliffeqarfiup akiligaanik naammassitissinnaavaat.

§ 40. § 39, imm. 1 naapertorlugu inerteqqut imaluunniit peqqussut malinneqanngippat inatsimmi matumani aalajangersakkanut ilaasut suliffeqarfiit ingerlatsiinnarnissaannut aalajangiisussaatitaasutut oqartussat inerteqquteqarsinnaapput aamma inatsisartut inatsisaat manna naapertorlugu akuersissutaannik atulersinneqarsimasunik arsaarinnissinnaallutik. Aalajangiinnermit allamik allassimasoqanngippat arsaarinninneq piffissami suliffeqarfimmut nalunaarutigineraniit atuutilissaaq.

§ 41. Peqqussutip qanoq ittuuneranut naleqqiullugu naammaginartumik erseqqinnerusumik piffissaliussatut aalajangerneqartup iluani suliffeqarfimmi eqqiluisaarnikkut tunisassiornikkullu pissutsit iluarsineqarnissaannut aalajangiisussaatitaasutut oqartussaasut suliffeqarfimmi inuussutissaleriffiusumi piginnittunut, pisortanut siulersuisunullu peqqusisinnaapput. Peqqusineq taamaattoq allaganngorlugu

nalunaarutigineqassaaq, suliffeqarfllu piginnittuanut aqutsisuanullu nalunaarutigineqassaaq.

Imm. 2. Peqqussut piffissaliussatut aalajangerneqartup iluani malinneqanngippat pissutsit pitsaanerulersinnissaasa aamma aalajangiisussaasutut oqartussaasunut uppersarsarneqarnissaasa tungaannut suliffeqarfik aalajangiisussatut oqartussanit matuneqarsinnaavoq.

§ 42. Atorneqarnermikkut nalinginnaasumik inuit peqqissusiannut navianaateqarsinnaasutut naatsorsuutigineqartunik inuussutissanik atortussalluunniit inuussutissanut attuuttunik tunisinissaq, pilersuinissaq tunniussinissarlunniit aalajangiisussatut oqartussanit inerteqqutigineqarsinnaavoq.

Imm. 2. Aammattaaq allanngorneri, mingutsinneqarsimaneri, asiusimaneri, kukkusumik nerisassiarineqarsimaneri pissutigalugu allatigulluunniit inuit nerisassaattut naleqqutinningsutut isigineqarsinnaappata inuussutissat tuniniarneqarneri, pilersuineq tunniussinerluunniit aalajangiisussaasutut oqartussat pisussaaffigaat inerteqqutigissallugu.

Imm. 3. Nalunaaqutsersuineq paasinerluissutaasinnaappat imaluunniit inuussutissat inuit peqqissusiannut navianaateqarpata imaluunniit inuit nerisassaattut naleqqutinningsutut isigineqarsinnaappata inuussutissat atortussalluunniit inuussutissanut attuuttut utertinneqarnissaat aalajangiisussatut oqartussat peqqusisinnaapput.

§ 43. Aalajangiisussaasutut oqartussaasut inuussutissalerinerup iluani ilisimasalittut siunnersortimit ikiortissarsiortoqassasoq imaluunniit suliffeqarfup inuussutissaleriffusup aqutsisui sulisulluunniit pikkorissarnermut peqataassasut imaluunniit aalajangersimasumik ilinniagaqarsimanissaat pillugu peqqussuteqarsinnaapput. Eqqiluisarnerup, nammineq nakkutilliinerup kiisalu inuussutissanik passussisarnerup iluani siunnersuisoqarnissaa peqqussutaasinnaavoq.

Imm. 2. Imm. 1 malillugu siunnersuineq, pikkorissarnermut peqataaneq ilinniagaqarnerlu pillugit malittarisassanik erseqqinnerusunik Naalakkersuisut aalajangersaasinnaapput.

§ 44. Aalajangiisussaasutut oqartussaasut inatsisartut inatsisaanni matumani imaluunniit taanna naapertorlugu malittarisassani atulersinneqarsimasuni aalajangersarneqarsimasunik suliassat naammassineqarnissaannut atugassanik paasissutissanik pissarsiniarlutik qaqugukkulluunniit, pissusissamisoortumik kinaassutsimut uppersarsaammik pissusissamisoortumik takutitsinikkut eqqartuussivimmiillu aalajangiinertaqaanngitsumik, illunut tamanut ammasunut pigineqartunullu, suliffeqarfinnut sumiffinnullu, assartuutitut, niuernermit allattaavinnut aamma allagaatinut, tassunga aamma ilanngullugit atortussat elektroniskimik pigineqartut, isersinnaapput.

§ 45. Suliffeqarfik inuussutissalerisoq aalajangiisussatut oqartussaniit noqqaasoqarneratigut, nakkutilliinerup naammassineqarnissaanut pingaaruteqartunik, paasissutissanik tamanik tunniussissaaq kiisalu nakkutilliinermit, misiligitissanik tigusinermi, assiliinermit aamma atortunik allanneqarsimasunik tunniussinermit aamma elektronikkikkut nalunaarsukkat anisinneqarnerini nakkutilliinermit oqartussanik akeqanngitsumik pisariaqartinneqarpat ikiutissalluni, tassunga ilanngullugit aningaasaqarnikkut naatsorsuuserinikkullu pissutsit.

Imm. 2. Paasissutissat oqaatigissallu nammineq piumassutsimik saqqummiunneqartut eqqortuusut suliffeqarfup inuussutissaleriffusup uppersarsarsinnaassavai.

Imm. 3. Aalajangiisussaataasutut oqartussaasut nakkutilliinermit nakkutiginninnermullu atasumik

suliffeqarfik inuussutissalerisoq piumaffigisinnaavaat uppersaasiinikkut inuussutissanit atortussanilluunniit inuussutissanut attuuttunit misissugassanik tiguseqqullugu imaluunniit akeqanngitsumik tigusissasoq, tassunga ilanngullugit tunisassiassat, ilaannakortumik nioqqutissiat kiisalu naammassillugit nioqqutissiat, sermeq, imeq, aalaq, silaannaq, silaannaat, atortussiassat aamma atortut, akiuiniarnermi sakkut, eqqiaanermi tunillannartuiaanermilu atortut il.il.

Imm. 4. Suliffeqarfik inuussutissaleriffusoq aalajangiisussatut oqartussaasunut misissugassanik nassiussinerni ikiuuttassaaq tamatumuunalu aningaasartuutigineqartut akilerlugit.

Imm. 5. Pisortaq isumaqaruni imaluunniit pasitsaassaqaruni, inuussutissaq suliffeqarfiup eqqussimasaa, tunisassiarisimasaa, suliarsimasaa, piareersarsimasaa siammartersimasaaluunniit inuussutissanik isumannaatsuutitsinissamut piumasaqaatinik inatsit tunngavigalugu inatsimmi matumani malittarisassanilu aalajangersarneqarsimasunik naammassinnissimangitsoq, suliffeqarfiup pisortaa aalajangiisussatut oqartussanut nalunaarutiginnittussaataavoq.

§ 46. Naalakkersuisut nakkutilliinissaq siunertaralugu inuussutissalerinermi inatsisip malinneqarnissaata qulakkeernissaanut pisariaqartunik paasissutissanik oqartussaasunut allanut piniarsinnaapput paarlaasseqatigiissinnaallutillu.

Imm. 2. Imm. 1 naapertorlugu paasissutissanik piniarneq, aammattaaq akileraartarnermut pissutsit pillugit paasissutissanut tunngavoq.

Imm. 3. Paasissutissat imm. 1 naapertorlugu piniarneqartut tunngavigalugit Naalakkersuisut nalunaarsuinerit paasissutissiissutigineqartullu malillugit nakkutilliartorsinnaapput.

§ 47. Aalajangiisussatut oqartussat inuussutissat pillugit inatsit naapertorlugu, suliffeqarfiup inuussutissalerisup aqqa taallugu nakkutilliinerup inernerinik kiisalu nakkutilliinerup suunera aamma pineqaatissiinerit annertussusaannik tamanut saqqummiussisinnaanerat pillugu malittarisassanik Naalakkersuisut aalajangersaasinnaapput.

Imm. 2. Nakkutilliinerup inernerinik pineqaatissiinernillu qanoq iliorluni, qanoq isikkulerlugu qanorlu annertutigisumik tamanut saqqummiunneqartarnissaat, tassunga ilanngullugu tamanut saqqummiussinerup elektronikkikkut ingerlanneqarsinnaanera pillugu malittarisassat pillugit malittarisassanik Naalakkersuisut aalajangersaasinnaapput.

Imm. 3. Suliffeqarfiup inuussutissalerisuata inuussutissat pillugit inatsit naapertorlugu nakkutilliinerup ingerlanneqartup inernerinik tamanut saqqummiussinissaminut nammineerluni pisussaafeqarnera pillugu malittarisassanik Naalakkersuisut aalajangersaasinnaapput. Tassunga ilanngullugu nakkutilliinerup inernerinik qanoq iliorluni, qanoq isikkulerlugu qanorlu annertutigisumik tamanut saqqummiussisoqarnissaa pillugu aamma atugassarititaasut suut tunngavigalugit tamanut saqqummiussinerup pinngitsoortinneqarsinnaanera pillugu malittarisassanik Naalakkersuisut aalajangersaasinnaapput.

§ 48. Nakkutilliinermut tunngasuni suliassat immikut ittut aalajangiisussatut oqartussaasut kommuninut suliassanngortissinnaavaat. Suliassat suliassanngortinneqarsimasut naammaginartumik isumagineqarnerinik aalajangiisussatut oqartussaasut nakkutilliissapput.

§ 49. Kalaallit Nunaanni Pinerluttulerinermut inatsimmi malittarisassat naapertorlugit akiliisitsisoqarsinnaavoq:

- 1) Inatsisartut inatsisaanni § 6, imm. 1 aamma 2, § 7, imm. 1 aamma 3, § 16, § 17, imm. 1, § 18, imm. 1, §§ 19-21, § 23, § 24, § 32 unioqqutinneqarpata.
- 2) § 8, imm. 1, § 8, imm. 3, §§ 39-42, aamma § 43, imm. 1. malillugit peqqussutininik malinninngitsoq imaluunniit inerteqqutininik piumasaqaataasunilluunniit unioqqutitsisoq.
- 3) § 44 malillugu Uumasunut Nakorsaqaarnermut Inuussutissalerinermullu Oqartussaasunik isertitsinngitsoqarpat.
- 4) inatsit imaluunniit inatsit malillugu malittarisassiarineqarsimasut naapertorlugit akuersissuteqaarnermut piumasaqaataasunik unioqqutitsisoqarpat.
- 5) § 45 malillugu Uumasunut Nakorsaqaarnermut Inuussutissalerinermullu Oqartussaasunik ikiorsiinngitsoortoqarpat imaluunniit § 45, imm. 3 malillugu misiligitissanik tigusinngitsoortoqarpat.
- 6) pisortani oqartussanut eqqunngitsunik salloqittaallunuunniit paasissutissiisoq imaluunniit inatsimmi inatsilluunniit naapertorlugu malittarisassat aalajangersarneqartut naapertorlugit peqqussutigineqartunik paasissutissiinngitsoq.

Imm. 2. § 6, imm. 3, § 7, imm. 2 aamma 4, § 8, imm. 2, § 9, § 10, imm. 2, §§ 11-15, § 17, imm. 2, § 18, imm. 2, § 22, §§ 25-31, § 33, § 34, imm. 1, § 35, imm. 1, § 36, 38, imm. 2, § 43, imm. 2, aamma § 47 malillugit najoqqutassatut malittarisassani aalajangersarneqartuni aalajangersarneqarsinnaavoq najoqqutassatut malittarisassani aalajangersakkanik unioqqutitsineq akiliisitsinermik kinguneqarsinnaasoq.

Imm. 3. Inatsisartut inatsisaat imaluunniit maligassat atuutilersinneqartut Inatsisartut inatsisaat akiliisitsissummik aalajangersaanissamik tunngavissaqartitsippata, akiliisitsissut Kalaallit Nunaanni Pinerluttulerinermi inatsimmi kapitali 5-imi malittarisassat malillugit inatsisitigut pisinnaati-taasoq pisussaataasorlu akiliisitsissummut akileeqqullugu peqquneqarsinnaavoq.

§ 50. § 49, imm. 1-3 naapertorlugit akiliinissamik arsaarneqarnissamilluunniit pineqaatissiinerup saniatigut peqqissutsikkut navialisitsinermik annertuumilluunniit kinguneqarsimasumik uteqattaartumik ilungersunartumilluunniit unioqqutitsisoqartillugu Kalaallit Nunaannut pinerluttulerinermik inatsimmi pisinnaatitaaffinnik annaasaqarneq pillugu malittarisassat malillugit Kalaallit Nunaanni suliffeqarfimmik ingerlatsisinnaanermut pisinnaatitaaffimmik arsaarinnittoqarsinnaavoq.

§ 51. Unioqqutitsineq akiliisitsinermi qaffasinnerusumik kinguneqartinneqassanngitsoq isumaqarfigineqarpat, Naalakkersuisut nalunaaruteqarsinnaapput, inuk pineqartoq unioqqutitsinermi pisuusutut nassuerpat piffissaliunneqartullu ersarinnerusup ingerlanerani, sivitsuinissap qinnutiginerata kingorna, akiligassap nalunaarummi allanneqarsimasup akilernissaanut piumassuseqarluni nassuerpat, suliaq eqqartuussivimmi suliarineqanngitsumik aalajangiiffigineqarsinnaasoq. Taamatuttaaq arsaarinnittoqarnissaanik piumasaqaateqarneq, tassunga ilanngullugu pigisanik nalilinnik arsaarinnissinnaaneq eqqartuussivikkoortitsinngikkaluarluni aalajangiiffigineqarsinnaavoq.

§ 52. Suliani allaffissornikkut suliarineqartuni, tak. § 51 Kalaallit Nunaanni eqqartuussisarnermut inatsimmi § 347 imm. 1 taamatuttaaq atorneqartassaaq.

§ 53. Kalaallit Nunaanni pinerluttulerinermi inatsimmi arsaarinnittarneq pillugu malittarisassat Inatsisartut inatsisaanni uani taamaaqataanik atorneqassapput.

§ 54. Inuussutissat immikkoortitat taakkuluunniit ilai arsaarinnissutaappata arsaarinninnermut atatillugu inuussutissat immikkoortitat taakku inuussutissanit allaniit immikkoortinneqarnissaat paarnaarlugillu naqissusernissaat suliffeqarfimmut inuussutissaleriffiusumut peqqussutigineqarsinnaavoq, taakkulu nakkutilliinermi oqartussanit nalunaaqutsernissaat naammagiinnarlugu. Inuussutissat nalillit arsaarinnissutaasimasut aamma inuussutissat allat akuleriissinnerat arlaatigut pinngitsoortinneqarsinnaanngippat inuussutissat nalii arsaarinnissutaasut siumoortumik aalajangerneqartumut sumiiffimmut assartorneqassasut suliffeqarfik peqquneqarsinnaavoq.

§ 55. Inatsisartut inatsisaat una imaluunniit taanna naapertorlugu maleruagassat atulersinneqarsimasut naapertorlugit akiligassiinerit arsaarinninnerillu, Nunatta Karsianut tunniunneqassapput.

Kapitali 15

Atortuulersitsineq, atorunnaarsitsinermi ikaarsaarnermilu aalajangersakkat

§ 56. Inatsisartut inatsisaat manna ulloq 1. januar 2020-imi atuutilissaaq.

Imm. 2. Tamatumunnga peqatigitillugu inuussutissanik uumasullu nappaataannik inunnut tunillaassorsinnaasunik nakkutilliineq pillugu Inatsisartut peqqussutaat nr. 17, 28. oktober 1993-imeersoq atorunnaarsinneqarpoq.

Imm. 3. Inatsisartut peqqussutaat naapertorlugu malittarisassat atulersinneqartut imaluunniit ingerlatiinnarneqartut, tak. imm. 2, atorunnaarsinneqarnissami tungaannut imaluunniit malittarisassanik nutaanik taarserneqarnissami tungaannut atuutiinnassapput.

Imm. 4. Suliffeqarfiit, manna tikillugu malittarisassat malillugit akuerineqarsimasut, inatsisartut inatsisaata matuma atulersinnerata kingorna akuerineqarsimasutut isigineqassapput.

Namminersorlutik Oqartussat, ulloq 28. november 2019

Kim Kielsen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut